

襄垣縣志

襄垣縣志卷七

古蹟考

古蹟考者著述之所豔稱而足爲一邑增色者也若八景之詩敷衍傳會後人從而詠歎之不足尙矣舊古蹟志列城壘寺觀井泉碑碣陵墓義塚橋梁諸子目而新志則載祠宇冢墓亭館之類或詳或略可考而知故所述一如新例焉

城壘

安民城 在縣北十里石勒攻上黨安仁城卽此

韓城 城北一里甘水之陽趙襄子築後周置韓州於此唐貞觀中廢

石勒城 在縣北五十里城底村石勒攻上黨築之以積芻米基址猶存

甯城 在縣北二十七里舊傳趙簡子築

湟城 在縣西北九十里漢上黨郡有湟氏縣顏師古注湟水出焉

臨漳城 九域志威勝軍之臨漳城周處風土記堯築

臨川城 北魏志襄垣有臨川城

襄垣縣志

卷之七 古蹟考

烏蘇城 北魏志銅鞮有烏蘇城

銅鞮縣 在縣西六十里國語銅鞮晉大夫羊舌赤之邑漢置縣今爲虎亭驛

五原故縣 魏志建義元年分銅鞮縣置

銅鞮宮 春秋晉平公築

虎祁宮 春秋昭公八年叔弓如晉賀虎祁也當時土木之興必宏麗甲一時雖動石言而不省乃今水抱孤垣登高而望惟見堆阜連綿堪增一嘆

上黨亭 漢地理志襄垣縣新莽改上黨亭

特恩堂 明劉文安公建有記

迴轅蹟 魏孝文辛洛迴轅處名小虎邱山

解水堡 舊唐志武德五年銅鞮縣徙治解水堡

砂石堆 魏志銅鞮縣有砂石堆相連如峯

龍山寨 在縣北三十里下良鎮蓋北虜南侵時所築也寨上有泰山行祠一座居高臨下風景絕佳嘉靖年進士郝良臣曾記之文附後

龍山寨新建太山行祠記

郝良臣

下良鎮寨舊無太山行祠建於嘉靖癸丑歲蓋北虜南侵撫臣令各郡邑增築堡寨以避賊鋒惟是有下

良鎮寨也寨樓成闔鎮居民樂成之適有郟進表者而言曰寨有齊雲落星之勢真一方之所仰賴不有壇廟以鎮之奚以重所尊乎况太山行祠舊在天子廟傍規制狹隘不足妥神展祀今鎮是寨曷有加于立是祠乎里人李哲李經李緒李純李練李絢李絳李縉李綰李應弼輩皆唯唯先捐己資以爲工本又抽籤驗神意繇辭叶吉神謀僉同乃擇日興工募於市野應者如響于是建正殿三楹前歇廊三楹左右耳房東西廡各五楹以上皆各繪塑神像外戲樓神廚亦罔有遺脫視前日草創缺漏大相雲泥工起于嘉靖甲寅冬十月竣事於丙寅秋九月蓋功力浩大故遲延頗久也先是予探親詣鎮諸親友邀飲其上時鳥語花陰雜沓交集又下見南山平臨北斗乃鼓掌嘆曰以名神而居此靈隩則斯寨亦重於斯廟而斯鎮亦顯于斯寨矣詩云愷悌君子求福不回鎮人有焉因爲文而刻諸石

寺觀

銅鞮文廟 在鹿亭鎮唐時建宋熙寧中鄉耆向慶等重修始置克鄒二公十哲於旁仍繪七十子諸大儒於壁元貞元年土民鄭全康安李英孫興重修有張碧記

銅鞮關帝廟 在鹿亭鎮北寨溝村像坐下有土室時間風聲順治間值姜壤之亂帝顯威護民今有記

銅鞮城隍廟 在鹿亭鎮北繪崔生遇虎舊跡殿西有碧霞宮三楹

三皇廟 一在縣治東南隅一在縣西北五十里後村元至正年建宋安興等重修

商湯王廟 在縣南門外

襄垣縣志 卷之七 古蹟考

周文王廟 在縣南二十里鹿臺山

周成王廟 在傳村

周公廟 在五音山宋景德初追封文憲王

漢孝文帝廟 在縣西二十里庄頭村

魏孝文帝廟 在縣北二十里神頭村

魏孝文帝廟記

姚九功

襄垣境內舊有魏孝文帝廟二一在縣西獅山北麓一在縣北五音山巔五音山廟祀歲時不乏考帝少時生母李貴人依故事賜死馮太后見其英敏恐不利己盛寒閉之絕食三日欲廢之而立咸陽王禧用東陽王丕僕射穆太尙書李冲固諫乃止又宦者嘗譖帝於太后太后杖之數十默然受之後竟無憾意父顯祖宏嘗患癰帝親咀吮太后崩勺飲不入口者五日哀毀過禮竟行三年之喪正律例定冠裳制禮樂較權衡立明堂辟雍親賢任能從善如流故太和三十年間雖嘗用兵於江南江北民安物阜雨順風調粗有熙皞遺風庶幾乎綱常仁義禮樂之主也五齡登極三十三歲而崩惜哉謚曰孝文非過情也帝自代遷都洛陽往來踴躍此山故後人祠之廟祀不絕但棟宇歲久傾圯里人姚洪歎曰帝前代賢主也吾輩村落雨暘祈禱恒於斯里中會社恒於斯可目擊頽毀令無裨後觀乎又恐捐錢穀者恠吝不與乃

獨發虔誠捐已貲以爲之倡既鳩工飭材復撤腐作新不三閱月而厥工告成峻宇崇簷華棖彩楠丹雘輝煌燦然可觀矣仰瞻帝像冕旒宸章神彩赫奕而臣僚班叙儼若朝儀肅穆謁容展拜自不敢慢且易也因計大工顛末鐫之貞珉用示後人云

魏慕容將軍廟 在縣北二十里世傳慕容赤土官拜右金吾魏孝文辛洛過九龍村忽天地昏暗帝大驚慕容乃剖心以祭天遂開朗駐驛始行因勅有司立廟祀之今廟有五一在五音山一在高廟嶺一在獅山一在王家庄一在東嶺村

唐李衛公廟 在西北迴轅店唐初公鎮守朔方土人思德故建宋明有碑記

唐崔府君廟 在縣治東南一百步卽長子令崔元靖元元統元年建一在縣西北韓庄唐初建康熙三十一年張伏英重修

重修崔府君廟碑記

邑人 崔鍾塘

夫人神之理一而已賦仁義禮智謂之人稟聰明正直謂之神則神也者必其生前之勳德既深沒後之英靈不著然後足感乎人心而血食不絕如府君之爲神也按府君諱元靖祁州鼓成人父母禱於北岳而生府君唐貞觀七年除潞州長子令正直無私明察秋毫縣有虎患不勞人力驅之如神後爲磁州滏陽令晝理陽夜理陰一日與楊叟奕罷見黃衣執符言曰上帝命以玉珪玉帶冠衣召赴五嶽衛兵百餘人拜畢奏簫韶之樂又取白馬至府君命二子取紙筆曰吾將去矣遂書白字以逝世傳以爲白字碑及明皇南巡府君乃紫衣示夢曰祿山必滅矣駕還闕立廟封顯聖護國嘉應侯武宗朝天下大水禱之卽止晉封公宋眞宗加封護國眞濟王上黨郡廟祀者指不勝屈而襄邑之北三十五里韓庄村亦有公廟焉茲廟也創建之日失考間有重修者舊碑已載之至萬曆三十五年居人張登仕爲之重加修飾至今

八十餘載基址傾圯鞠爲茂草矣其孫伏英深有感激而力不能勝時默祝於神曰吾家若能度日定將廟宇重新已而家室果漸昌也遂急謀於衆曰吾村百有餘家晴雨禱於斯災疫祈於斯而聽其暴露神軀是尙可忍乎於是厚捐已貲以舉其事村中富者施其錢粟貧者效其工役不數月而告成見其殿宇輝煌聖容燦燦不啻天光雲影一時頓開矣繼而索記於予予曰人恃神而立神依人而行伏英能堅志立舉神其佑之矣非止一人之祐也凡托宇下歲登大有人慶昇平彰善癉惡以助治化寧獨非神之賜乎乃不辭鄙俚而爲之記

渤海龍王廟 在縣西北庄裏村

護國靈貺王廟 在縣治南李信村舊例每年六月初六日委驛丞代祭

昭惠靈顯王廟 在縣北一百步拱辰門內

元帝廟 在縣東門內五十步

東嶽廟 一在縣南李村西涼樓廟一在縣北下良鎮

碧霞元君廟 堡后村下良夏店西營鎮各一

玉帝廟 在縣北曹家坪康熙四十二年郭悼重建

重修玉帝廟記

邑人 郭倬

韓州之北三十里有村曰曹家坪背山面河風俗淳厚卽龍山古地也村東北原上舊有玉帝廟一楹創

建不知昉於何時順治十二年余先曾祖與先祖暨村中父老稍加式廓然僅小殿三楹東西茅屋數間而已迄今又歷四十餘年棟宇剝落脊瓦傾圮茂草荒蕪蔽露狹隘先君每顧而興嘆欲從而更新之乃有志未逮越至辛巳三月倬入廟思敬憶先君之言如昨不禁愴然若有所失遂發憤重修以伸先嚴之志於是獨出已貲鳩工庀材日夜焦勞自此需木需石需鐵需瓦需磚需灰畚者鍾者尋者引者斤者鋸者塑者繪者無晨無夕不來聒於兩耳擴卑隘爲宏廠起墜頽爲跋翼易漫漶爲鮮明以及塗墍丹牖肖像之事凡可經久而美觀者罔不竭力以圖今增修通明寶殿三楹東南角殿各一座東西廊房六楹維精維堅以巍以煥廟貌聿新妥侑斯在始事於辛巳之秋落成於癸未之冬幾經歲月而始告成四方來觀者見其金碧莊嚴也雕牆峻宇也規制之宏而輪奐之美也視舊不啻倍蓰乃驚相歎以爲余之功德也嗚呼余特繼先祖父未逮之志於萬一焉爾豈敢自以爲功哉因請記於同州刺史武鄉乾符趙先生而述其顛末云

重修曹家坪玉帝廟記

趙三麒

蓋天地生成其法自然之謂道陰陽鼓舞其功不測之謂神天之神曰帝帝德穆穆之謂皇德符於九爲衆化之宗者其惟玉皇高上帝乎謹按帝原光嚴妙樂國淨德王元子聖母寶月光皇后禱嗣聖真感太上道君節導授玉質於恍惚至丙午歲正月九日午時降誕長辭尊顯於普明香巖中修道功成歷三十二劫而登金仙復尋忍辱三千二百劫爲清淨自然覺王如來漸入虛無妙道又經億劫始登玉帝位上

極金闕青童紫微扶桑之君仲侯左靈東華之夫人雖位上清而猶臣妾玉皇太上以下如陪臣焉信上極無上之又元也秘文六百八十八字提攝三十二天清明天主玉虛上真摩不讚歎希有所不可思議者張天帝曹明帝何古何今解脫光如意光孰盈孰虛果本行所謂去來自在以爲拘變化通靈而莫測與韓州曹家坪即龍山勝地也山川相繆上與天黨有玉帝舊廟創自貢士郭倬之先人工屬草創能洪有待倬敬業之餘撫遺謨而繼志彰仁里以增華大開流電之庭復起舞佾之閣三靈盼饗九炁氤氳伏讀皇經云玉女散香靈妃捧皓培胎含孕俱得生成因式廓兩序敬設卹印諸天抑秉至誠之動上祈長發之祥獨力落成徵余紀事第帝德難名秦皇封表止立無字之碑開元觀銘聿屬有爲之殼以麒麟鄙何敢輕擬天倪竊比老彭之述特書甲子以昭來許

銘見後

木佛廟 在關家溝金河清三年佛像在古檀樹中出鄉人立廟祀之明天順六年重建

媧皇宮 一在縣治西南隅 一在陽澤村華龍山張克家等創建

壽聖寺 在縣治東南三百步嘉靖十八年僧了捐重修

崇福寺 舊名靖福寺在縣治東南一百步嘉靖四十三年僧淨義重修寺前有樓乾隆三年盧喜重修三十六年邑紳士據舊郡志仍立爲文昌閣至甲午科邑內中式三人知縣賈慎行有碑記

寶峯寺 在縣西五十里後周麻衣僧修真紫巖山洞建寺山峯有無梁樓麻衣遺像在焉明成化間僧能修重修

大殿悲記

宋提刑 張商英 四川

智無自性而能分有分別然後有癡愛有癡愛然後有執取有執取然後有生死苦樂至於極樂不可得智者悟苦諦之本空復而歸於無苦樂至於窮衆苦隨之智者觀樂性之自離復而歸於無樂執盡則真現前十方平等皆吾之智體也三界蕩然皆吾之智境也諸大菩薩證此之智出世間矣而不斷世間之法非衆生矣而不壞衆生之象所以者何大智無作而不以大悲運用八廓利物則六趣起沒誰拯誰拔且也滯寂沉空而欣真厭妄爲聲聞爲緣覺爲淨修菩薩而已耳是故觀世音大士於過去無量億劫千光王靜住如來所聞持廣大圓滿無量大悲心陀羅尼生大精進即發誓言我若當來堪作益利願我此身生千手眼發是願已其身即生千手千眼具足從是已後所生之身不受胎藏於金光師子遊戲佛土蓮花化生問彼佛言諸供養中何者最勝佛言以慈心回向菩薩是爲最勝於是發六誓願當於萬億劫大悲渡衆生復次於觀世音佛所得耳門圓照三昧六根元用法門彼佛授記觀世音號能現八萬四千母陀羅臂清靜寶眼此大悲之音也唐初天竺婆羅門蘇伽陀拜壇場卽見之法自是中國始有千手千眼大悲像其說大抵大以大悲爲觀世之變音而降伏魔怨之迹或以卽咒而入寂滅定或以卽咒而得解脫神通或以卽咒而見百千淨妙刹土或以卽咒而召乎龍鬼或以卽咒而却疾癘或於壇場中現阿難身而說法商英三復其書而疑之殆樂著小法者流通之舛也何明之華德藏菩薩問釋伽佛曰觀世音云何得如幻三昧以善方便隨衆形類所成善根而爲說法佛言菩薩成就一法謂無依三略不依外不依內於無所依得正觀察正觀察以卽得正盡由此言之則壇場卽咒尙何依乎菩薩以愛語同事利

生三十二應隨類現形則千手千眼者亦何施乎然則千手千眼無千之千而非一百千之千也千手者示引迷接物之多也千眼者示放光照暗之廣也八萬四千者衆生塵勞也衆塵勞無盡菩薩慈悲亦無盡一一塵勞具一一寶手華手香手普手無量手乃至八萬四千手一一塵勞具一一智眼天眼最勝眼乃至八萬四千眼苟無衆生塵勞則一指不存而况乎千萬臂乎一瞬不具而况千萬目乎夫智者菩薩之所獨悲者菩薩之所共獨而不共或障則淨共而不獨或障則染故善財問菩薩道於善知識往見觀世音於金剛山之西阿而東方正氣菩薩自空中來與觀世音同會西方陰慘而爲悲東方陽舒而爲智智悲會融則佛之體用全矣此觀世音之所以爲大悲也而索之殊形異像千變萬化何其詭哉或曰現未曾有身以折伏九十五種外道則惟摩訶語以一手接妙喜世界毘耶會中豈亦有外道乎會上黨紫巖寺大悲像殊持端妙礮巨石以待記者四十年矣主僧之聞商英之判大悲也合掌贊曰善哉眞得佛意謁官之文以破俗疑乃辨其宗著之於篇

慈雲寺 在縣西南常隆村西嘉靖四十一年僧清景重修乾隆四十六年僧顯威重修

香巖寺 在縣西桃樹村南正德年間會汧重修寺前有文昌閣

興福寺 在縣南十里南峯

圓明寺 在縣西五十里蒲池村

仁濟寺 在縣北五音山前

淨居寺 在縣北上
良村北

建封寺 在縣東李
信村西

仙堂寺 在縣東北五十里仙堂山下相傳一夜風雨大作起視林石偃仆佛殿實幢已
運山上佛像三鐵一石一木一佛前各湧一泉殿外別有二泉又名五泉寺

化成寺 在縣北三十里下良鎮
嘉靖十年僧眞德重修

五峯寺 在縣東北
六十里

開化寺 在縣西北
五十里

華藏寺 在縣西三十
里王璧村北

先天觀 在縣北門外唐天佑八年建明宏治年漳水衝毀知縣王錦擇地欲遷之邑人
王均慶捐北關之西地十畝爲先天觀卽今觀是也院有古松人多避暑於此

先天觀重修記

姚九功

嘗聞鴻濛既判三才攸分庖犧氏畫八卦以洩造化之精先儒稱萬世斯文鼻祖卽堯舜周孔之道朕兆
開先矣烏有所謂玄與釋耶自黃帝問道廣成子老聃受經關尹喜玄端昉鳴師說未立後河上公莊周
列禦寇鶡冠亢倉諸子各立一家言並陰符素書胥譚玄標指也旣漢文得蓋公而信之黃老之說益著
沂流桓帝之世道書至三十七家上下數百年間若赤松子嚴君平魏伯陽王弼之輩皆以辟穀煉服吐

襄垣縣志

卷之七 古蹟考

六

納之方爲玄教嚆矢盛云極矣三國時張道陵獨擅宗盟魏晉以來謾漫寔溢祖旨沉整故先儒謂道術
有五清靜煉養服食符錄經典科教而是非懸殊咸欲冒老氏而宗之雜則甚矣苟以清靜言則曹參李
文靜師其意均躋治平何宴王衍肆其誕適貽亡亂得失蓋相半也煉養之法仙家隱訣也歐陽文忠公
嘗較正黃庭朱文公嘗稱參同二公且不以其說爲謬何辜於名教哉經典科教之言雖鄙俚卽古者祝
史覲薦鬼神之遺意子路曰禱爾於上下神祇亦未足爲世鉅蠹獨服食符籙二端絙菑糜細樂大李少
君于吉之徒竟殺其身柳泌張歸眞之徒以此旣人而自嬰其戮張角孫恩林靈素之徒遂敗人家國天
下矣詎柱下史八十一篇之旨耶故蘇東坡氏記儲祥宮謂臣按道流本出黃老以清靜無爲爲宗以虛
無應物爲用合易之何思何慮孔子仁者靜壽之論秦漢以來用方士言始有飛身變化之術黃庭大洞
之法太上天真木公金母之號天皇太乙紫微北極之祀下至丹葯奇技之巧咸以道流爲統臣切謂黃
帝老子道之本也方士之言末也公之論確矣猶夫釋教西來特四十二章梁武華林園之集蔓引五千
四百卷餘詎瞿曇氏正法眼藏之旨耶故陳了翁謂佛法不在文字亦不離文字只金剛經一卷足矣要
之只九字謂阿耨多羅全句而九字只一覺字猶中庸之誠字也朱晦菴亦謂金經大意只在須菩提問
云何云何降服其心二句佛說應無所住而生其心及令一切衆生皆入無餘涅槃而滅度之只一無字
二公評隲何簡嚴哉我高皇帝訊掃胡元廓清華夏以崇先聖之道非不能人其人火其書以雜二氏蒺
蒂耶顧張宮攝衆何以故吁有說矣二氏之源具在無害也濬之而已矣釋源濬則重門寂寂風無跡啼

鳥一聲天地光玄源濬則一潭秋水清常在滿洞朝雲淡不飛尚不爲清世光此或太意也苟病其流而堙其源因噎廢食矣余故曰濬之而已矣無害也矧論者曰釋道儒日月星辰也缺一不可此佛老之宮徧縣寓而莫之革襄邑先天觀卽老氏宮舊在廊北孝廟朝邑大夫醴泉王公樹邑乾方崇靈飛棟密廡脩廊天尊諸佛像金碧炫燁良可侘前脩而侈後觀後值豪家子肆侵牟者撤左右廡子遺諸殿孤峙氣象寥落殊爲識者所訾詈一日鄉耆路得雷等紕黃冠趙清安各捐重資先將三殿若諸聖容鉤釵失絢趾石滅磚堪垂永久事旣勾余爲文以識歲月余謂孔子竊比於我老彭孟子闢楊墨而不及老氏老氏之道孔孟所不廢也余何人也敢辭不文以效眩篋而詆二氏者爲哉

幽棲觀 在縣西五里西川
村元至元元年建

洞真觀 在縣北四十里
元延祐四年建

長生觀 在縣北五十里鴈谷溝
村元至元十七年建

廣佑庵 在縣治西南隅 乾隆
四十一年僧顯萃重修

瑜伽庵 在縣治北門外東北順治六年李光
緒李開雯等建知事王國治有記

靜業庵 在縣北四十五里南坪村天啓元
年馮裴建康熙四十三年增修

襄垣縣志 卷之七 古蹟考

七

棲雲庵 在縣北二十里土名洞兒嘴重圍斷塹
水遠山環萬歷丁亥邑人姚九功建

普照庵 在縣北
十里

三聖堂 在縣治東
五十步

白衣堂 在縣治
西北

觀音堂 在縣治西南一東門外二
南門外三北門外四

大慈堂 在縣治東乾隆
二十三年重修

白衣三聖閣 在縣西南迴轅店康熙七年崔洪文
砌建四十三年崔鍾瑤鍾塘重修

三義至聖祠 在縣西北迴轅店康熙三十
四年崔洪文建崔鍾塘有記

建白衣三聖閣碑記

崔鍾塘

夫人生而願有子有子而貴貴而且壽斯亦不可必得之數矣惟其不可必得也於是而供白衣焉曰此送子觀音也於是而事文昌焉曰此桂錄神司也於是而禮張仙焉曰此延祐大聖也似幾幾乎可以有子而貴而壽矣無如今之事三聖所在皆然而有子而貴且壽者之卒不概見抑又何哉卽如余邑之三聖閣建自康熙六年實余父洪文爲之領其事蓋以邑之巽地宜建巍閣而且下臨河橋上拱山壁足

爲一邑巨觀越三十餘年而棟崩椽折不堪仰視遂復爲之重加修飾以壯觀焉斯時也余父年已七旬矣猶拮据以董其事者豈好勞哉蓋以易云聖人以神道設教俗語云愚人見像作福今茲寶閣巍然神軀燦燦跪而拜者未有不凜然畏畏則善心可生起而瞻者未有不肅然敬敬則肆念不作豈以祀茲三聖卽可以有子而貴而壽之云乎哉余因思夫人之心自有真神焉存一潔白心卽白衣也存一光明心卽文昌也存一悲愍心卽張仙也人能存此三者烏知其不有子而貴而且壽乎不然天無私祐也神無私庇也亦視夫人之所存爲何如耳

建三義至神祠碑記

邑人 崔洪文

間閱邑乘襄邑古韓地也邑之北三十里有迴轅店說者謂魏孝文取迴車之意載在郡志祇見騷人墨客至於斯者往往流連嘆賞以爲其山最秀其水最媚其風俗最醇厚土地最肥腴是以地靈人傑之區必有輝煌殿宇以爲一邑之偉觀卽古所謂人恃神而立神依人而行之說也鄉故有佛廟創建無考明季兵燹後牆垣傾圮廟貌榛蕪我先人糾合善信從而光大之其香亭兩廊以及歌臺舞閣燦然具備廟宇旣煥神像聿新噫先人不惜百金之費以共成盛事恒欲勒石以貽後人惜也有志未逮也今日者聖天子敬天勤民特頒諭旨以鼎新廟宇旌關帝之勳以萬世師表崇孔聖之德成有見忠義者心之本也道學者身之範也桃園三結義而忠義著焉東山一堂而道學昭焉千百年來人懷丹心士存正氣家絃戶誦鼓吹休明孰非忠義道學之結於人心者深乎因復謀諸衆於佛殿之乾地建三義至聖祠以祀焉

旣立祠矣而復勒之石夫勒石非示異也亦以成先人之志也蓋先人之重修不可沒於前而後人之建造猶欲垂於後後之人苟有得於立祠勒石之意者必曰此有志於世道人心也夫

二仙祠 在縣北十里白石梯之西麓

二仙祠記

邑人 李 彖

襄垣之坎方十里許有山哀然崛起名曰白石梯西有大谷蜿蜒屈曲將數十里其高下之勢岢然嶮然若垤若穴其整峻之狀白石齒齒懸巖峭壁其石之負土而出者突怒偃蹇礧礧礧礧如馬牛起伏其木之據石而生者盤折拳攣疎密倚徙若虬虹飲河其花草榛莽茂密而豐潤樵牧者不敢蹂躪其潭黛蓄膏停酌之清冽甘寒擊之凜然有聲雖無源而亢旱不竭其氣幽暗晦冥雲霧時出獨旁有一區石平土厚坦夷爽塏神祠建焉人有禱者因誠僞而應之如響歲時伏腊遠近奔禮者成市二仙事不見經傳俗傳一母雙誕比長採藥入山乘祥風而仙化里人立祠祀之其說悠謬不根固不可盡信若斯境之佳神必有依焉者且二仙祠在在有之而此祠靈應獨異於他良以是也側聞之昌黎韓子曰山之最遠而獨爲宗其神必靈意者此地之山靈爲之乎是亦未可知也噫嘻至誠感通幽冥相與之妙也蓋誠存在我而已若欲窮神之源固不當如是瑣瑣矣往歲邑中惡少數十輩聚祠行劫旣而不遂逞忿毀其肖像以及門宇未幾爲邏卒所獲尋磔於獄神之報昭昭如是里人韓思誠輩率諸同志各捐已貲不惟完葺其舊貫而增新又倍之請予記其年月昔柳州羅池廟成過客李儀醉酒侮慢堂上扶出廟門卽死韓子勒

之於石以垂儆於後念諸少之惡浮於李儀而神之靈不減於子厚大可勒而垂儆也已神之赫赫者固不係於祠之有無吾人之嚮往者非祠則無以致其誠也祠之建已百年完之復可百年後之繼此而有作者將謂無其人邪

硃砂洞 在仙堂內舊傳有人煉丹於此後成仙去餘見山脈

麻衣僧塔 在縣西寶峯寺之西距寺二百步許

陵墓

周晉大夫羊舌氏三公墓 羊舌職長子赤字伯華次子肸字叔向合葬於虎亭赤壁舖之西雍正七年欽命巡察宋均題

周韓宣子墓 在城東北二十五里

戰國韓王陵 在城東北二十里

魏氏池長崔游墓 在縣西十里晉武帝以故府僚屬拜郎中不就漢劉淵以師徵御史大夫不受故書魏官

後趙右長史大執法張寶墓 在縣北水碾村十六國春秋寶卒贈散騎常侍右光祿大夫儀同三司謚曰景

重修後趙謀主右長史屢進大執法張公墓記

邑令 李體中

公姓張氏諱寶字孟孫中邱人幼好讀書闊達有大志嘗自比張良及石勒狗山東謂其所親曰吾歷觀諸將中無如此將軍者可與共成大事乃提劍詣軍門請見初亦未之奇也後數以策干勒謀無不合大

襄垣縣志

卷之七 古蹟考

九

奇之及謀誅王俊斬劉曜下幽州定晉陽收河北平西秦其運籌帷幄決勝千里翊贊後趙卒成王業是以勒嘗言曰吾所未了右侯已了之愈加敬重遂進大執法呼爲右侯而不名及卒勒流涕曰天不欲成吾事何奪吾右侯之速也嗚呼公之英雄偉烈遭時運主輝煌史册本縣城底村乃後趙建都之地則公卒葬於斯焉不卜可知矣前任鄭公仰慕其爲人曾爲之封墓豎碑余來尹是邑值碑殘字缺督令下良鎮鄉總約李士英水碾村鄉總約趙維侯等重修立石書其官爵姓氏并鸞詩三首鐫之庶不負前人建立之意後人其護持勿廢可也是爲記

元魏邢太尉墓 名巒在邢村

慕容將軍墓 在縣西十七里

唐昭澤王墓 在城外東南百步許

唐杜宰相墓 名如晦在縣東北五十里城底村

房宰相墓 名元齡在縣北四十里豐曲村

唐飛騎尉連君墓 在縣西十五里桃林山之西君諱簡字隆潞州襄垣人也少負大志有膽識及長嫻於韜略祖願齊任并州太原縣令父公隨初任汴州博士遷洛州參軍文章事業俱詳誌石貞觀中君以六郡良家首膺召募算無遺策戰則

身先士卒尋以征高麗功授飛騎尉職冠冕相望門庭赫然解組後琴樽賞逸風月陶情題詠爲一時之冠嗣聖六年終於家館葬於城西純孝鄉之第平原誌石嘉慶間塌出道光辛卯冬知縣張飭連族封誌植樹因爲文以表其墓碑文見後光緒間知縣沈因

上憲訪求唐魏古刻復將誌石取
出刷印多張飭存石於漳川書院

連飛騎墓碑

張力卓

石工李某言城西十五里許麥隴邊塌出石刻內有奇字搨而觀之蓋唐時邑人連簡字隆暨室張氏同穴而首行但題大周故飛騎尉連府君墓誌銘妻統於夫也序十六行銘七行不著撰書人名文沿六朝餘習字兼篆草行三體其載年月日等字武后所製時人不識故云奇唐武散官採隋舊名貞觀十二年始於左右屯衛設飛騎尉秩從六品朝會則周衛階陞聽勅宣入巡幸則夾馳道衣五色袍乘六閑馬連君以征高麗功得補斯職序稱六郡良家首膺召募與貞觀十九年克遼城詔率五陵之勁騎董六郡之良家合卒於永昌元年實中宗嗣聖六年明年九月武后稱皇帝改元天授國號周飛騎不及見耳葬於天册萬歲二年景申一月天册萬歲次年即萬歲通天元年春時尚未改也而作景猶避唐諱也武后以十一月為正月故以正月為一月至謂連氏係出伯禽是東野氏之比意當時通姓氏學者多如李守素且號人物志源流或不謬歟此墓經今一千一百三十七年矣連族環居衣襟猶眾徒以譜牒失傳未能紀遠秋場既滌約與赴勘地室隱然其上平疇六畝范氏之業屬其公購仍封誌石並成墳植樹以表之獨惜飛騎占籍襄垣已非一世祖父皆顯兆域無稽茲山昔名第平原頗占形勝其東三里桃園元集賢學士連肇之墓在焉又東二里東鎮明建文御史連楹之墓在焉楹致命遂志彪炳史册葬僅招魂亦足悲已然肇祀鄉賢楹祀忠義豈非其先流澤孔長哉余徵誌詞之信尤欣古冢之完儻而勒石俾連氏子

襄垣縣志

卷之七 古蹟考

十

孫共勉為忠孝云

後唐李節度使墓 名嗣昭在縣東北四十里段堡村沒於戰塋此

元李尚書墓 名執中在縣南十里西王橋村

李學士墓 名安在縣南合河里

楊中書墓 名仁風在縣南郝家溝村

明連御史墓 名楹建文侍御也殉節靖難後弛禁復官贈卹其子孫斂衣冠塋於縣西三里在東畛裏

李都御史墓 名濟在縣南王橋村

劉副使墓 名潔在縣東北韓山之麓

劉員外郎墓 名鳳儀在縣東北韓山之麓

劉文安公墓 名龍在縣之東北蕭家梁村

劉都御史墓 名夔在縣東北蕭家梁

劉文安公神道碑

蒲坂 楊 博

公諱龍字舜卿別號紫岩山西襄垣人也出宋元城忠定公之後曾祖端祖潔父鳳儀世為巨卿公生而

穎異氣局深宏十歲屬文乙卯鄉薦第二己未擢進士第一甲第三人授翰林編修公淬礪於學造詣益純充經筵講官壬戌乙丑兩爲會試同考預修孝宗實錄丙寅丁憂歸己巳復館職時逆瑾用事因有所侮改兵部職方主事轉吏部考功員外郎雖在左遷悉意經理公之政事權輿於此瑾誅復原職尋陞左春坊左中允兼翰林修撰領司經局事修玉牒講官如故陞侍讀學士癸酉乙卯兩典順天鄉試庚辰掌院事今上御極初開講筵經筵日講公皆爲首命教庶吉士江汝璧等二十八人與及第三人預修武宗實錄陞禮部右侍郎詔賜講臣封贈適母張太宜人卒公歷侍郎纔數月耳具疏請贈考妣上以勸講勞特贈刑部員外郎鳳儀公爲通議大夫禮部右侍郎太宜人爲淑人加賜御祭命有司營治葬事不爲例乙酉服闋復原職轉左侍郎日講如故一日講孟子誠者天之道章深愜聖心特諭曰龍謂黃河清爲至誠能動之驗欲朕謙以履盛約以持盈其意甚善因此益加寵眷乃以御製敬一箴睿宗御書文獻通考諸書賚焉丁亥歲計吏求退不允陞南京禮部尚書公至南都考求故事修復儀文典禮煥然明備明年復求退上益加慰留轉南京吏部尚書適當考察之期公奮然以進賢退不肖爲己任於是鑒裁精核聲實必當評隲品列不惑浮議人咸稱其清恕園邱成授資政大夫贈祖考皆如公官轉南京兵部尚書參贊機務與中貴人及勳舊大臣共事公廉靜自持卒無所撓畿內肅然宣大告倣公上疏募壯勇設巡邏精器械明賞罰嚴操練補軍士六事並見採納居留都日久熟其利弊銳意與革如修兵政以肅軍令崇武學以蓄將才清蘆洲以補快船之乏復陂池以充戰馬之費補四營逃亡之卒察黃船影射之弊操三

衛軍舍以銷江北之盜罷五關守把以息中官之擾皆因時定制得大臣經國之體後稱善繼者不能易也暇則與翰林官修復瀛洲勝會登覽游宴寄諸咏吟蓋宛然前輩風度云乙未公歷尚書六年當考最俄有旨詔還京公又求退益力上察其惓欵特允之仍命馳驛以歸公雅志恬曠既得謝事日從親故登臨山水爲樂田廬之事不以攬懷會北有警或勸引避之公曰吾將安歸登陴授兵人恃以無恐賊知有備亦遁去部使者猶以宿望論薦而公不起矣卒之日赤氣亘天大星隕於城北嘉靖癸丑六月七日也享壽七十有八及赴聞上傷悼焉贈太子太保謚文安諭祭四壇遣官營葬卜日奉厝於蕭家塚祖塋之次禮也

明都御史黃巖劉公神道碑

禮部尚書孫承恩

嘉靖癸卯山西黃岩劉公卒於家閱四年其子鄉進士承裕走都持其同鄉官贊閭君所具狀授承恩俾爲文憶昔辛未歲承恩忝隨公舉進士同選翰林院庶吉士讀中秘書見公終日恂恂然若無所爲者而不知中實自勵每閣試院課公未嘗不與多爲諸老稱許因知公用心之專且勤異時將以文翰名也既而解館職業殊途承恩且臥病山中久之乃不知公所樹立今觀狀所具則公之履歷具在其才識器度豈特用意文翰哉公於癸酉歲初授兵科給事中值今上即位一新庶政有詔起用太監肅敬公曰初政係天下觀望而先用宦寺恐失天下心時同列皆知不可而莫敢言公抗疏諫止辭甚剴切疏留中數日不出人爲公危公曰吾知盡吾職耳若計利害當不言矣上亦悉公忠愫竟優容之繼改翰林院檢討與

修武廟實錄銳意欲復古史法曰作史者美惡並書若侈美而諱惡其何以示勸戒毅然以直筆自任衆論有同意必辨析求是無阿循焉事竣補大名府通判長官政務有疑多於公取決關元城書院聚生徒肄習而啟迪之科目滋盛逾年陞南京宗人府經歷轉南京戶部郎中盡心於職長卿多賴其功庚寅陞江西按察司副使隨督學河南作人之功居多尋陞布政司右參政甲午陞山東按察使甫視篆閱所部囚冤狀者數百人曰殺人不以罪國法天道安在乃悉縱釋之逾年擢都察院右僉都御史奉勅巡撫保定幾內重地值歲屢歉貧民多起爲盜公竭力撫綏鎮之以靜潛消其變歲蝗勢漸甚移檄督捕甚嚴後蝗不爲災紫荆等關爲邊重鎮公躬親巡歷練卒選將相度要害分屯防守三年邊塵偃息居民安堵朝廷無西顧憂東南輸賦以漕河淺澁病事聞詔命疏治公按圖記地督衆分役未幾以次訖工璽書褒獎有白金文綺之賜及乞休歸家居猶爲守令咨益而民陰受其惠其在諫垣以清正爲衆所推累疏時政得失動數千言雖觸忌諱不顧也公著有黃巖奏議七卷其文皆平正暢達詩多和婉可誦集隨地命名凡四種並藏於家公諱夔字舜弼別號黃巖世爲襄垣人生於成化丙午得壽五十有七子男三長即承裕十七舉鄉試亞魁博學有文能世其業次承華貢生三承祥庠生將以戊申葬公於韓山之原朝廷命有司諭祭承恩曩辱交契之末拙文不足彰公盛美特以承裕固請重念平生乃爲叙其大略如此

姚參政墓

名九功在縣東北五里璫頭村

王御史墓

名基洪在縣西南小黃莊

襄垣縣志

卷之七 古蹟考

十一

王吏部墓

名雲龍在縣西南三里秦家溝

吏部考功司郎王霖宇墓表

尙書程啟南

銓部霖宇王君予辛丑年誼也君卒於太昌之元年爲之名者留吁慕襟漳表則懇之予邑魏光緒光緒未竟其事至今二十年餘矣霖宇室宜人者走一使持行狀懇予表予告老歸休不親筆墨已久豈能承此役哉但霖予生而友愛死而可哀安敢以不敏辭公諱雲龍字從之霖宇其別號也其曾大父成業農桑大父斌有丈夫風因里甲之害呈縣申臺司疏奏除之修建廟舍覺宮昭澤及城隍廟公爲之首倡城垣河渠及衙舍等役皆公效其贊成之勞後舉鄉耆爲鄉賓斌二子長即公考諱俊臣無改於父之道每談陰隲獎勵後進以明經三仕爲教職後因子賁累封吏部考功司郎中今祀鄉賢事見諸銘公生五子而霖宇最幼自七八歲父即器之亦以產公之日見一人尺許大自空來入於太宜人懷晚即生公人皆知其不凡也年十八入泮遇考首擢者十三次而庚子魁鄉辛丑成進士三爲令兩丁艱其居喪也哀毀骨立凡治喪一從文公禮其治三邑也首臨胸正直廉明愛民如子惡惡如仇人頌神明再任束鹿亦以治胸者治鹿但鹿歲苦河害公相地勢築隄防水治水通之於河三年而民得安堵治維八月擢吏部主事屢遷稽勳司郎中衡鑑平明不通關節務求得人有裴楷山濤之風時事神宗皇帝有刺客張差者突入東宮欲刃皇太子事發覺下三法司問止擬杖公慷慨面折乃擬梟首一時公卿俱歎服焉尋轉考功而公寢疾矣乃告歸當時三載歲凶四民方饑公以時事爲憂飲食日減以太昌元年四月日終於正

寢壽五十三歲葬公於縣西三里許祖塋中公無嗣取姪問卿問達爲嗣問卿武學生員問達儒學生員女一適生員馮隆期孫一名之翰曾孫一時方十歲皆問卿出公素愛三堂姪曰問仁問禮問義皆感公之德立碑於二十二年之後三人實襄其事焉時皇明崇正十四年歲在辛巳孟夏之吉

張節婦韓氏墓 在縣南王濬初誌銘

明大理寺正卿趙陞墓 在城外東南一里許 昭澤王墓之東

郟將軍墓 名惟安在城北郟家煙村北明天啓年間封掌管四城將軍銜

清朝張武德將軍墓 名約在縣西四十里西莊村西北興隆凹

義塚

義塚 在縣西門外介神坡係潞安府知府蕭公來鷲於康熙六年捐銀十兩買民地十畝東西長四十五步南北闊四十三步本縣知縣趙良璧有除糧志石又東門外一里許先農壇東數十步地係金時所置荒廢已久光緒四年歲大侵人民倒斃屍骸暴露因查出此地立義塚以掩埋之

枯骨墳 在縣郭東北金大和八年王郎置年久無考今止有栗希孟記在雙榆社碑陰

義塚序碑 在郝村其碑文斷裂不全詳其所存字義蓋邑人粟姓者斂藏枯骨之爲亦義事也

下良義塚 一在鎮北橋則岩村李從智施地二畝許一在鎮西狐則溝地五畝許

襄垣縣志 卷之七 古蹟考

十二

碑碣

甘澤王廟記

武鄉 馮顯宗

嘗觀名垂竹帛功勒鼎彝悠久而不泯者莫不以年高德邵練達老成者爲之如鸞熊之輔周裴度之佐唐談笑於尊俎之間折衝於千里之外巖巖德望鎮於一時豈後生之所能髣髴其萬一哉若以幼穉之年而輔成國家之治者吾於甘澤王見之公下蔡人也以名家之後事秦文信侯其時未有知名者及其聞事毅然排難解紛有不可奪之節若勸張唐之出相使趙國之郊迎廣河間之地襲秦爵之封斯數者英風凜凜千古逼人昔孔融登李應之門項橐爲孔子之師幼則幼矣孰能過之宜其千載之下景仰英風而血食無窮也縣之西北西河底緣西廂矚附岸而北有泉出焉所謂甘泉也每遇亢旱祈禱必應里人苗欽因舊廟年久基址傾頽獨捐已貲市財陶甃重復修建此固仁人君子之用心也經始於正統十三年落成於天順三年廟貌既新庶使後人歲時享祀共答神庥書此以紀歲月云

重建神祠書舍記

潞城 屈銓

聖明大闡文教天下郡邑學堂齋舍之屬莫不全具所以作人才重風化也襄垣儒庠湫隘曠久巋然而存惟明倫堂東西兩齋而已成化庚寅秋三原張侯曉以進士出宰是邑下車伊始興利除弊百度惟新至於興學勸賢尤拳拳而加之意先聖廟宇密邇於學廟東有地一區自兵興來據於豪強張侯朔望謁廟跡學之暇見是缺然召彼居民諭以遷退之宜民亦樂從無敢違忤既獲其地卽命工經理其事前畫

文昌祠三楹後有書舍十有六楹區分丈列度其靡費銖兩之微可得而就也侯乃捐俸自倡以爲營構之費因人樂輸以充僦遣之資是以材木輻輳而無科征之擾工傭立辦而無灑派之煩作人材重風化孰大於是吁地蝕十餘世而開之於一旦官經百餘輩而勦之於一人豈非興廢有時而千載一遇乎是以刊諸堅珉以紀歲月云

重修關帝廟記

劉龍

余觀古人處世使其名傳諸不朽靈爽常存千古一日出於人心之所追慕弗容已者大槩有三曰立德曰立言曰立功然非有先後次第也所遭不同而所立因之有異焉耳德見於操修言形於議論功著於施爲皆有裨世教足爲千古法程由是感於人心而廟祀興焉廟祀之興不踰三者焄蒿悽愴洋洋如在所謂不朽斯其至矣若聖帝廟祀始以立功爲不朽之尤者乎凡廟祀各止其所或於桑梓或於履歷非泛然無因也故其所及亦有數而不能廣惟帝之廟祀則異於是京師有之藩省有之村落有之其有之者又不止於一王公貴人下及編民之家率揭其遺像尊禮之多不嫌於泛侈不以爲淫帝何以得此於人哉則功之立有裨於世教也漢有天下且四百年歷世久矣流澤深矣比其季也三綱淪九法斁一時草竊之徒稱帝稱王赫然自以爲得志無何而覆宗絕祀不啻飛鳥之餘音雲烟之過目世皆唾詈之不置矧有爲之廟祀者耶今帝去世若此其遠屋而祀之俎豆而薦之僕僕焉而亟拜之彼豈嘗接帝之風度聆其警效哉帝知有漢室盡臣子之職而已豈計其身後之享一至於此所謂秉彝好德曠世而相感

者非歟昭烈以中山之裔奮起蠶叢之墟君臣戮力誓圖興復帝雄武號萬人敵樊之役威震華夏魏議遷都以避其鋒向使江東犄角同爲翊戴祀漢配天不失舊物特反掌間耳乃甘心委命助桀渝盟遂成曹氏之篡雖才如孔明竟以孤立無與飲恨渭濱天不祚漢謂之何哉春秋之法以討賊復仇爲大義帝素好左氏春秋諷誦不輟目擊時事固大法所難容者興復之志堅如金石相國厚遇示以用我若可從也而王室之賊吾惡得從敵國求婚示以親我若可許也而王室之仇吾惡得許惟鞠躬盡瘁死而後已者是與焉帝之功裨於世教彰彰較著血食之盛傳諸不朽有由然也又惡得以成敗論人物哉襄垣縣治之東南百武許有帝廟不知建自何代據舊記永樂間重修迄今垂二百禩頹敝不稱過者惕然興感屬歲事屢熟民用乂康耆老李文全王漳等相與勸募修葺泉貨總至市地拓基增廣殿宇諸制咸備煥乎壯麗視舊殆將倍蓰踰年而後落成謁余爲記因書帝之所以不朽者俾勒諸石嘉靖三十四年歲次乙巳八月望後穀旦

重修昭澤王廟記

郝良臣

嘉靖辛卯秋九月重修昭澤王廟成首事者徵文於予予不文緣躬覲其概遂弗敢辭按縣志王爲唐異人以秘術宏濟時艱民賴以生沒之日民用不忘維是有廟廟在縣之離方歷唐季五代宋元暨我明一統世不廢祀正殿五楹歷歲頗久漸以棟撓於是焦黨王斌崔景然郭宏寬黃公庭史繼郭才盛黃堯臣郭宏澤輩率顛有衆飭才鳩工始事事焉又募於邑厥應如響既備乃布尋累堂疏牖壯闔丹黝髹漆方

楠圓椽實實枚孔曼且碩起春三月壬辰止九月戊戌凡二十有一旬乃襄其事既落成觀者堵進爭擊羊豕雉魚執醴醢寓信辭伐鼓嘯籥虔潔踞奠以告厥成功維昔聖賢儼在祀籍纔可屈指間或以殖或以平或以序或以勤或以寬或以文皆鑿鑿可考是皆功鉅驗遠故越在異世鬱有馨香人心翼載饗報不已被禮樂而崇儀章擬於生者吾王術妙當世捍禦薦多而默感冥通越世尤甚視前數聖賢雖考履殊祥亦要均之潤下而奇流不可謂非水也則今究安宅以引以長實分所以誰曰有可隆替哉雖然廢興成毀物數皆然既剝而復既夫為姤消息無停天行之則物數象之矣廢興成毀相尋無窮耳目屢遷誰能為一今諸君有是舉也則固為興為成為數之更為時之復為事之夫為耳目之一新顧不可優嘉也乎敢望如諸君者於千百世焉是為記

文昌祠記

姚九功

襄邑學宮東南隅舊有文昌祠梓潼帝君嘉靖八年改為啓聖祠固一時權宜之計也夫神絜貫於天則為列星精英神遊於地則為昌文靈秘凡錄秩桂籍皆所綱維故天下郡邑學宮咸立祀神與孔子類從丁祀血食無窮我鄉缺是祠越五十餘年邑侯成吾由公以名進士歷御史秉臬憲為當塗排擠左遷視篆甫一載凡廢政之巨者罔不作新復念茲墜典卜學前隙地一區鳩工飭材建正殿三楹東西兩序六楹戟門稱之不踰期而厥工告成且見峻宇重簷華椽彩楠金碧烜炫丹雘輝煌殿中聖像端嚴衣冠灼灼神彩若生謁容展拜自不敢慢且易也襄邑文曜弗暉久矣我公掄才教育復建文昌祠以補覺宮廢缺庶幾神以人受文以神昌蹇厄土運不將轉而為床徵嘉會也邪工始於萬歷六年三月落成於本

年八月宜勒諸珉以記歲月云

重修昭澤王廟記

王雲龍

夫民資五穀而生五穀資雨而生 昭澤龍王之神固司雨澤以生五穀而生萬民者也厥係蓋亦重哉按神誕降之原行蹟之實與夫嘉封之自前人記之已詳余不復贅獨計神造福於民必有所依而立而後神之靈聚民祈福於神必有所以受神者而後神之功著比來歲多旱無乃廟頽圯無以棲神所致歟萬曆二十六年先大人以簿宦告致歸緣居址近神且本廟曾經先大人重修因會典史崔誥前創其事議物料估工價力非一手一足所能支也財非一錢一穀所能辦也乃約主簿趙鎮壽官崔守庫等詢謀於致仕參政姚諱九功者慨然樂施悅符其意各出錢若干備席一百二十餘面邀請闔境義民量力輸助時邑署篆縣丞劉諱炳文賢二尹也亦施送雜木助工選材陶瓦擇吉興工逾三月而大殿並捲棚成乃是秋不登衆輸分貲不繼其餘工未竟而止至三十九年邑侯武公諱可則甫下車留心民瘼每遇歲早則竭誠為民祈禱乃兩禱而兩應慨然曰此神功於民而靈於應何不舉全廟而更新之遂施穀若干期為民以受神由是百姓感公之盛舉莫不願忻然施穀三十二年余以讀禮之變回籍嘉茲美意且念係先人欲為未竟之緒亦捐俸數金少資工匠之費典史崔誥朝夕在廟督視料理經始於三月吉朔落成於八月既望正殿五楹視舊高五尺許易暗門板窗以格扇後壁開門與寢門通捲棚舊三楹今易五楹視舊亦高五尺許左右殿各三楹視舊高三尺許樂亭臺樹隆起下開磚券正門周圍易新牆堵內鑿

井一函近廟居民汲取咸稱便但見窳疎於明顯戶壯於開闢藻有丹碧陞有等夷巍然渙然大異前制工竣而督邑諸父老謁予爲記余以爲雨暘之權操之者神也召之者人也輪奐一新有所以安神者矣而以和致和又有所以格神者焉我公冰蘖存心愷悌敷政已感神於廟貌之外是以有禱輒應而民被其陰庇也雖然長民者奉行公道苟爲百姓者奢淫是務卽神豈以膏澤私匪人哉故人人皆有君子之行是余不佞之所望於我襄也而雨暘時若恒必有之矣是役也鄉耆楊邦壽官崔燦崔之亨儒士王言鄉民黃汝勵郭思金趙具沈宏進黃汝松武登楊崇文趙可久馮鈿史應常皆有勞於廟者法當備書

重修關帝廟碑記

崔鍾塘

從來忠孝節義可以垂法萬世卽可以血食千秋者孔子而外其惟關聖帝君乎帝神威浩蕩如日月經天而光無不昭江河行地而澤無不周是以都會郡邑及僻壤窮鄉莫不尸祝之若此者何良由直道在人感慕自不容己也城之有廟創建莫遯其由重修亦難殫述然規模宏敞者未幾而風雨剝蝕莊嚴不著是不可不修也爰有士民路思溫等各矢虔誠協力營造先請於邑侯德潤劉公公曰善舉也遂慨然捐俸以爲之倡及謀諸士民莫不樂施以助於是百物俱備鳩工庀材乃歷四載而財力絀矣維時李全才鄒大仙等復走中州募及襄之經商者方敷厥用由是殿之前後上下金碧輝煌燦然奪目較前敝陋大相雲泥其功始於雍正九年五月落成於十三年九月首事者欲鐫石以垂永遠乃求文於余余曰帝君力扶漢室孤忠自許書之不勝書也自唐宋元明代著威靈又述之不勝述也惟我朝定鼎以來崇祀褒封已稱至極今皇上追封三代式昭啓聖之功改祀太宰克配天地之享夫豈有所私於帝哉蓋重其忠孝節義以爲萬世法也余願襄之士民崇祀廟中永懷正直之風也可是爲記

重修昭澤王廟記

邑人

趙默

神者人之庇也人者神之依也使人無以依神神亦何由庇人神人有相通之理故祀典所載凡神之有關於國計民生者必立廟祀之蓋欲人藉廟而依乎神即依廟而庇乎人也襄城東南隅舊有 敕封昭澤龍王廟由來久矣 王之功績靈佑興雲致雨捍患除災前人誌之已詳茲無庸贅但廟重修於明萬歷間迄今百六十餘載風雨漂搖日久傾圮觀者莫不動興工之意然往往有難色者以功大而費繁非千金未可輕舉也丁丑春住持僧理白敦請合邑士民公議謂費雖繁無不可分而助功雖大無不可漸而理天下事有志竟成何必盡諉爲難况有本坊好善樂施之趙琦者捐貲百金以開其端曷即募諸十方以成其事於是主其事者有人勸其事者有人同心量捐協力營謀爰具募疏請之邑侯體中李公公曰此盛舉也慨然捐俸爲邑人倡遂祈城鎮鄉村紳士商農展敬神之念大解囊之施莫不欣然樂從以成其義未幾材木輻輳矣磚瓦俱備矣衆匠雲集矣擇吉興工爲正殿五楹香亭三間 聖母殿土墻易爲磚墻舊頂易爲新頂正門一座侍壁二圍東北立社堂三楹東官庭三楹格扇十二庫房二楹大抵朔新居多唯樂樓悉依舊制是舉也始於乾隆二十二年春告竣於二十四年秋實糜金錢二千餘緡向所謂費甚繁者今果分助之而有餘向所謂功甚大者今果漸修之而畢備夫乃知人之所以依神者在斯

神之所以庇人者亦在斯紅雲禦寇之威道人指洞之化安必徒顯異於前也哉因爲之勒石以垂於後

新建奎星樓文昌閣碑記

邑人 崔育榮

襄邑之北三十里有村曰東故縣其南爲鳳鳴山形勢聳拔上接雲霄旁則音山斜峙下則史水環流誠勝地也識者每謂此山之東南隅宜建奎星樓文昌閣於上非徒爲觀瞻實足以培地脉振文運不同於尋常營建之無關緩急者也癸巳春有附近善士某等十人咸謀成此盛舉各捐貲十兩復募四力好善樂施者共得二百餘金庀材鳩工卜日興築諸君協力經營不辭勞瘁樓起三層中層祀文昌上層祀奎星椽栴巍然丹雘燦然蓋於是歲之秋而告厥成焉越四載諸君屬予作文以記之予嘗登眺其上見其軒豁高聳萬象森列負山面水近收數里之文瀾就日瞻雲遠挹千重之秀色因不禁喟然嘆曰吾聞山川清淑之氣含孕委積而不洩者必鍾爲傑人然則爭自濯磨以副山川之靈當必有連鑣而起者矣諸君此舉夫豈淺近功德也哉特是星霜屢易興廢無常創始者作之於前能保其歷久而不敝乎則嗣而葺之又不能有望於後之君子也夫

重修五龍王廟碑記

邑人 趙培翼

邑北郭外有五龍王廟創建不知何年稽其重修一於至正十年一於景太五年迄今日久彫零殿無崇宇樂樓之臨於甘水者屢被侵塌勢若累卵邑人目擊感懷屢欲脩之未果甲午春總約王永財等奮然議修詢謀僉同於是士民之在本坊者俱踴躍急公解囊共濟未幾而殿宇輝煌巍峨在望矣兩廊壁立高廠可觀矣樂樓移建永杜河患矣而且丹堊鮮明彩畫精緻山門墻堵無不煥然一新是役也始於乾隆甲午六月成於丙申三月其經始也若甚難而其垂成也若甚易何不期而就理如斯蓋神功之佑助大矣事成屬記於余余不揣固陋因記始末於貞珉云

重建南關閣碑記

張力卓

夫祀有正有從有專有合冗則褻非其分所得祀神必不據祭亦無福縣屬邨廟憑臆立神又取所見所聞牌書泥塑不倫不次甚至荒誕無稽一併羅列即南關閣亦然建自天啓四年修於順治五年務華少實至道光十一年傾圮念其四山環峙一水帶縈占邑之勝圻而重建舉殘像付之東流禹貢衡漳集傳衡古橫字酈道元直謂之衡水橫水並不稱漳曾攷以地形東西橫南北從河從漳橫爲解然天下水之由西赴東者衆矣漳獨以衡名何也嘗聞漳水入處舟皆僻易倘以其力言之如弱水例邪夏官職方冀州其川漳其浸汾潞鄭康成注潞出歸德漢時兩歸德一屬汝南一屬北地與冀無涉清漳出樂平少山濁漳出長子發鳩山地志於山海經合桑欽云二漳異源下流相合同歸於海御纂書經及周官并採地理今釋云二漳會於河南涉縣交漳口東北流至直隸廣平縣分二支一支東行入衛河一支爲經流東北行經山東邱縣界復分二支一支北行入大陸澤一支爲經流直隸清河阜城交河至青縣合衛河北流至天津西沽合桑乾諸水東行入海所謂老漳河也其一支入大路者亦東北行至天津西沽合諸水入海所謂新漳河也桑說洵不謬也唐人因其獨達清以爲瀆然當禹時漳至阜城入河迨漢後河從

東南大伾而下非其故道乃獨達勢使然也易被謂漳一名潞則職方不應分川浸闕謂周以濁漳爲潞清漳爲漳則清漳未若濁漳之大何以名川道元謂他川無可浸者巨浪長流惟漳水耳潞城爲春秋赤狄之國得名已久漳至是而稱潞過是仍稱漳易氏闕氏皆有見而云然歟且濁漳匯納細流至潞城西南淳泓可灌溉則或以流者謂之川潞者謂之浸歟縣故多山亦多水史水甘水原委境內涅水西漳來從境外而濁漳一以貫之蓋沁州武鄉長子屯留壺關長治潞城平順之水悉歸焉余曾閱旱欲用南方車注法僉曰河水瘠地寒土夫自鄴以東開渠築堰引漳溉田明著史冊何享其利不虞其害歟勿以此邦之人難與圖始至浸不得浸歟近因漕道淺澀漳河助其浮送天子嘉濟運功益隆廟祀而邑居上游每於夏秋間興雨旺源禾稼藉以優渥則雖山川同壇宜專祀以答其貺也故立河神位於閣文昌帝君薄海尊奉前明議入祀典遷延莫決嘉慶六年特旨崇祀與關聖大帝同城有閣有祠咸逼闡闢未能見遠文風不振或少神助故設位上層之樓夫農者衣食之原土者禮義之表將欲遂生而復性得無有資於是也乎

重修城隍廟碑記

李廷芳

蓋聞聖人以神道設教凡廟宇之創建皆使人入廟思敬生其嚴畏之心歛其放逸之志不敢得罪於鬼神也然神道之廣大大洋洋乎如在非專於一郡一邑然也若城隍則朝廷勅封之神與牧令陰陽相爲表裡雖廟宇遍天下而一郡一邑各有專祠襄邑之有廟建自明初其間創造幾何年重修幾何輩前

人記之詳矣自我朝定鼎以來未有起而新之者予於己亥六月下車入廟展禮見其照牆傾圮前殿後寢基址俱壞兩廊法像殘缺失體令人不忍逼視卽諭住持設法修補彼以工鉅費繁前亦少事修理奈力弗勝任難再舉也因循者已二三年幸有善士王諭等毅然爲重修計矢公矢慎竭誠募勸因捐貲者無不嚮應凡木石瓦甃之類數日而集於是鳩工庀材補其殘缺新其黝堊增其未備舉寢宮正殿廊廡樓亭照牆牌坊並前後左右一切一神像煥然聿新誠極一時之大觀矣經始於癸卯春二月落成於甲辰秋八月越一年而工竣首事者徵予文勒諸石予竊謂廟貌整齊金碧輝煌非徒以壯觀瞻恣遊覽也幽明一理隱顯相維城隍司福善禍淫之柄有禦災捍患之功聰明正直賞罰悉視乎人之自取人惟常生其敬畏之心歛其放逸之志不敢得罪於鬼神則城隍之靈實式憑之而祠廟維新規制大備更足以展祀而妥神血食永於千秋保佑及於萬類人心之誠所不能自己者億萬載下不有同情也哉

城隍廟重修大門牌坊記

崔拱辰

今夫龍之靈變化也靈不在雲而匪雲無以妙其靈虎之威搏擊也威不在風而匪風無以聲其威鬼神之威靈感應也威靈不在廟而匪廟無以昭其威靈吾邑城隍神廟勢通兩街殿寢廊廡碑亭樂樓之屬高華麗爽較它廟特勝無乃威靈昇斯崇報殊與顧太門三楹雨或漏下居民憂之靜觀子曰衣裳帶履袞然整飾而敝冠在上將望者目惜九鼎雖成而金鉉未備則鼎無以舉大門前向猶人之元服朝夕出入猶鼎舉移之繫也蓋僉求維那者而徒憂爲於是壽官崔守庫崔之亨往謀於今考巧郎王公公卽

捐貲若干仍張筵勸衆獲施有差公兄王雲鶚司會計予兄崔之晉董役儘拮据焉維敬者正易朽者堅木其棧錦其瓦琉璃其脊樑棟椽題加以油彩夾道之墻巷口之坊亦藉更新猗矣哉外內交輝表符於裏觀者覩是門也不必循墻登陞可以知中之富美矣孰非神之感應使然哉工竣郝尙志武登王道正請記其事予居神右讀書齋宿房邇神之庥而庇神之福久矣故不以不文辭

重修太山廟碑記

李靑綺

西營鎮之廟宇殆十餘所矣惟太山廟獨據形勝之地其勢崇高其景幽雅真足以妥神靈也而有不僅此者余聞前輩多設學於此而卽因以成名故康熙年間本鎮之趙子名孟侯者在此以得選拔乾隆年間武鄉之韓子名翊者在此以登賢書其他藉此以入巖序而食廩餼者尚不一而足蓋景幽雅故居於內可以絕紛擾而定心志勢崇高故觀於外可以開沉滯而豁胸襟又復有文山聳峙於巽方水環流於山足世嘗說人傑地靈兩相需也理或然矣第自乾隆三十九年重修以後迄今已幾六十載歷時既久而墻垣瓦獸俱有毀壞傾頽之象是誠不可不急爲修葺也幸賴首事諸人同慨然以任其責多方募化鳩工庀材或仍舊或拓新閱一年而工始告竣而殿宇輝煌廊舍寬敞不惟可以妥神靈亦并可以便講學也倘後之有志之士克藉是以成其材有益於國家有光於吾黨豈非修理者之所深願而神靈之所甚樂也哉是山之底又有聖母廟相傳以爲后土聖母云亦一時重修首事諸人因告余曰是舉也皆集衆貲以襄成者也爰當鐫石而傳之永久故略叙其梗概云至其創修之年與其所奉之神位前碑記言之已詳因無煩再贅焉是爲記

重修雲峯寺碑記

前人

佛爲西方之神三代以前中國未嘗有佛自漢明帝遣使求經而佛教遂流行於中國嗣後浸昌浸熾千餘年間凡通都大邑以及僻壤遐陬莫不建立梵宇圖像禱祀前代雖間有禁令旋亦中輟說者謂神之精爽不朽使然也顧必以爲人之功德莫大於立廟祀神心之向善莫切於燒香拜佛則正不然夫古今之崇信佛法者孰有如有梁武帝乎然吾聞梁武帝嘗問達摩曰朕創寺寫經不可勝紀有何功德達摩答曰此乃人天小果有漏之因如影隨形雖有非實夫達摩爲西方釋祖釋家之所稱爲二十八祖者也而其所言如此則人之欲求佛於菩薩之庇佑者當必實有其善可矣西營鎮之古寺曰普明寺者後改稱爲雲峯寺創建不知何代所可稽者有前明與我朝康熙雍正年間補修之石刻越今幾百年風雨侵蝕漸就頹圯里之人以爲有其舉之莫敢廢也公議重修寺中前後兩院最在內者爲 三身佛殿因墻壁消毀則惟加補葺而已中殿有當陽佛有觀音大士以及羅漢諸神像焉前院有劉將軍殿伽藍殿焉頽廢已甚則皆重新改作之又舊製有餘屋兩楹前輩曾爲設學之地余亦嘗肄學於此而規模甚隘今則擴而大之復增修餘屋三處蓋所以爲藏修游息地者欲寬然其有餘也其存心如此其善當亦神明之所深鑒者也道光五年二月興工九月告竣一二首事者以爲是廟之來多出募化囑余作記以誌不忘余因述達摩祖之所以言因果者亦以諸君子向善之實心自有在焉而非漫詡其功德云爾是爲序

敕封康惠昭澤王碑記

邑人 趙廷芝

縣治東南隅有昭澤王廟士民崇奉已久粵稽邑乘所載王係唐懿宗時人世爲焦姓出家得道又遇神人授以靈符寶籙除患安民隨試輒效會上黨有妖害延王治之妖遂息郡守以其事上聞封爲雲雨將軍縣北七十里有洞五狐盤踞王驅之修真其中遂脫蛻仙昇及五代唐清泰二年草賊嘯聚官兵不能禁忽洞中紅雲四起空中若有鐵騎聲亂石飛下如雨賊無子遺加封靈侯五代晉開運二年旱魃爲虐各處詣洞求雨應如響加封顯聖公自是有禱卽應無遠弗屆至宋宣和元年加封爲昭澤王元世祖南征渡海時見王陰爲之助加封海瀆王明太祖定鼎封爲龍洞神是歷代皆有加封而徽號未膺於本朝甚缺點也同治元年夏六月邑侯橘堂老父台軫念民瘼下車伊始適亢旱乃率闔邑士民赴王廟虔禱閱日即普降甘霖竊惟例載凡各省志乘所載廟祀正神實能護國保民有功德於天下者由各督撫題請敕封况王之爲靈昭昭矣允宜邀請封典用答神庥我侯稟請上憲由昭澤王爵再行加封奉督撫稟題內閣撰擬茲於同治二年六月奉旨鈐出康惠欽此懿鑠乎盛哉夫靈爽式憑舉世享休和之福功德罔外盛朝隆崇報之儀錫之以康曰平康曰義康爲國家靖氛氣加之以惠曰恩惠曰德惠爲民物託命原顯威靈於千百世普樂利於億萬民夫豈但康濟我士庶惠澤我閭里也哉爰記我大清加封康惠所由起並我侯添設殿之兩旁諸位神像俾後有所考云

同治二年歲次癸亥中秋月知事陳宗海附入志

襄垣縣志

卷之七 古蹟考

二十一

北溪居士趙公墓表

李 豸

公卒於成化乙巳八月初十日未有墓表時諸子皆幼也今始舉者從其長子樸菴遺命也樸菴病革進弟約縞繆并子文瀚曰先君子沒時吾方弱冠僅知哭泣銘記未遑所以至今而未舉者猶望後有餘日也今病若此不得復爲矣若^等爲我成之衆泣諾後數日文瀚請予述其槩且樸菴之墓劉紫巖先生題其表其弟黃巖先生銘其內公之世系出處行實略盡矣予不佞謹以不敢竊擬其後辭文瀚再強文瀚與予麗澤幾二十年義弗可固執奈晚生無據何按公生於景泰之辛酉正月二十日同遊之老尙有存者因得其狀而叙之公諱聰字克明別號北溪居士曾祖諱有才祖諱惟中父諱翥三世皆業農翥公娶張氏生男五日子英日子旻日子昂日子昱日子賢繼室宋氏生公公少慧辯不拘小節習騎射與孫吳諸書雖在邑庠其志每不屑舉業翥公愛重右於諸兄一日謂公曰吾垂老汝功名未見成就吾死將不瞑目矣今援天順壬午例強之至再三方就始主南皮簿歲值寶興儒生徐廷璽者以見忌於令不得與公于儔人中識其不凡力爲薦引果中式今爲太僕寺卿大盜曰蘇望李賢劉信者流劫於吳橋界百姓苦之當道者累年緝捕死傷甚衆乃歐公於是邑公身冒鋒刃面縛三盜境內稱平初二邑人未知織衽公召民間婦令其室李氏側室李氏教之未知糞田公躬督焉政績便民者殆不可勝記尋陟寧晉令除書未下丁宋氏憂制終越二日而卒享年四十有四子五人長曰經次曰約次曰繼次曰縞次曰縞孫二十三人日文瀚日文澍日文湜日文灝日文淳日文澤日文溢日文澈日文淵日文瀾日文洪日文治曰

文闕曰文潤曰文泳曰文淬曰文溥曰文潔曰文溪曰文渫曰文洛曰文浚曰文洽有女二長適邑人巡檢王鈇次適宗室勛豐鳴呼聞公之年不配德功業不竟未嘗不爲之太息及觀公之子皆成立而諸孫復方進未艾又以見天不負於公云

邯鄲趙樸菴墓表

劉龍

予里曰強計在邑東北深山中而予族獨居一村循村而北三里許復折而西且數里有里曰邯鄲里之著姓曰趙氏父老相傳爲晉大夫趙簡子後雖無所於考而里以邯鄲名不知自何時疑有自邯鄲遷於此者因以名其居而吾邑襄垣又傳爲襄子所築城則是里是姓必有所本矣有諱經者字載道別號樸菴旁祖惟中祖燾俱有隱德以富厚稱父聰歷任南皮吳橋主簿生五子樸菴其長天資明敏多知謀慷慨能斷邑人有盤錯難解者必曰非載道不可至則數言定之里中及本族或小有爭忤輒詣而請平未嘗至官府邑宰時或與謀亦往往稱善謂可任以事而禮遇之方年十五主簿公宦遊委以家政即井然有條理居數年貲產益充視舊凡幾倍闔邑無出其右父罷歸駭曰不圖兒克家若此也成化壬辰邑大飢至人相食三原張公曉爲令勸粟以賑富人多難之樸菴首以義倡大發廩給諸貧者全活甚衆張至其家勞嘉之族有鬻歛不能舉者濟以粟帛有差有子弟繁衍居隘無以自拓則割舍傍近地畀之若文璽文恭文遷者皆族姪也邑丞李葵訓導郭士英俱以祿薄嘗假白金若干比去任弗能償愧無以白遂各還其券曰無復言正德戊寅又飢貸食之民延及鄰邑有至自百里外者家人以遠欲勿許樸菴不可

曰彼以急投我奈何拒之餒者遠路往返勢必死是我殺之也予之皆感泣而去晚年罹變故幾殆事定益奮拔不衰美庄數處散在諸村以此遊歷躬督家人事耕作而故宅與墳墓在邯鄲非歲時展祀罕至正德庚辰四月十二日值其初度置酒邯鄲大集姻族盡歡戀戀弗忍舍若知其將永別者明日疾作不起識者以爲得首丘之義配李氏經歷弘之女無出子三長文瀚邑庠廩膳生力學能文足爲遠器側室馮出文澍文湜側室李出初樸菴有四弟皆幼而主簿公卒撫愛曲盡爲擇室名家且圖所以榮其身者於是約爲陰陽官纏爲義官縞爲邑倉宰官縉爲王府典膳官各能綱紀其家樸菴嘗語人曰諸弟有成我得藉手見先人於地下矣居常自負其才以義授散官有弗慊者遣文瀚受業於予曰吾兄弟皆失學悔無及已所賴以光門楣者庶其在此平生樂與儒彥遊禮度雍容鮮有忤色論事可否談鋒亶亶滿座傾聽自奉甚約瀚衣蔬糲與寒士無異而賓祀未嘗不豐謙恭之節聞於遠近咸慕之曰趙載道佳士也富者有是哉予與交餘三十年聞其訃慟甚阻以官守弗能弔且紼焉因其孤文瀚之請爲表其墓以發予哀後世有過而讀者亦可以想見其爲人而信邯鄲之有後云

晉藩教授王明渠墓表

王基洪

萬歷甲辰正月晉寧河王府教授明渠王公卒於家年七十有八矣其子臨胸公雲龍余同年友也時循功令上最天官臨胸公於青齊間赫然推循吏計旦暮被經綸榮所自出而公遽朝露也訃至長安余就邸慰則臨胸公簌簌然涕淚沱曰不孝抱恨終天矣不孝謬膺長民所不以冥冥速官諉者家人實教

不孝也不孝且復銅章墨綬覲顏民社竟不能以吾章服生榮吾父也成服而星行皇皇抵家閨九月十七日而襄大事使使持予年友李公芳所爲狀至京師太史鄧公士龍業銘其窆矣屬不佞爲之表其墓蓋仁人君子義不欲死其親也予不佞生長里中蓋尤稔公素云公先世皆長者隱德弗耀父斌性抗直爲鄉飲賓公之爲諸生也甫弱冠爲舉子業工甚讀書求自得不超軼繩墨亦不斤守師說試輒屈其儕伍負笈而從者日益衆尤究心太極西銘皇極經世諸書以至六韜八陣皆得其解然卒偃蹇復克一第以歲貢謁選得霍州訓導嚴師範絕束贄遴士之才秀而貧者課其執而瞻其不迨於豪貴蔑如也時督學使者以試士至郡問一二行優者示旌勸霍有士賢以貧故弗當同事意公曰夫士賢不肖乃在貧富哉固爭之而貧士卒以賢得旌長吏前尤不作呢訾嚙態會霍有省官之議移公於解無何遷晉藩寧河王府教授乃王孱不度公數以諫忤人有語公者曰何不以嘿嘿容而爲此激聒也公曰吾自束髮受書頗以義氣自許雖曳裾王門而平生浩然且觸雲霄安得禦三寸屏息貴人前乎吾有廬可居田可耕子可課吾計決矣遂棄其俸併其賜歸其難進易退如此先後宦遊凡五載計囊橐僅能具饘粥稍出其贏者什一以佐伏腊室廬阡陌皆諸生時故物時以經義課臨胸公先是生臨胸公有異兆旣試有司鮮有出其右者庚子貢於鄉辛丑成進士大宗伯馮先生於諸弟子中獨奇臨胸公曰此福星也求得以爲令旣之官旋迎公宦署臨胸公卽色養多方終無喜色曰吾不欲以四簋食爲廉也而業策名委質第欲視而矯世污巖操切節用於內而樹德於外以無負知遇耳旣而見臨胸公汰賦稅之餘抑中涓之橫省

刑弼教治有聲迹躍然起曰固吾志也吾卽死且瞑目矣遂歸鄉里不數月而捐館公素有大志而阨於遇起家明經一爲郡博再爲王傅歸而祭酒於鄉鄉人惜公之厚積而未竟其施又惜公之獲報而未竟其享死之日無賢愚少長輒嗚咽流涕嗚乎公可謂不死矣公事親孝雖貧每具甘旨應省試雖資斧不具必預計溫飽始行公性豪宕好施予雖家無擔石儲而姻黨宗族有待以舉火需以婚塋者別墅王橋濱於漳橋圯褰裳者病之公率子弟壘石爲橋以資渡隨掘地得錢數百斤郊行見露骨命家人荷鍤瘞之回首有二金簪布之地一日見漁父將鬻鱉於市買而置之移步得錢一緡倍其償此皆公煦煦細行隨事輒報人皆耳而目之然公之德必有陰施於冥冥之中已不及知人不及見者故天生賢嗣以大彰其報則臨胸公之生豈偶然哉吾每嘆世人少知鉛槧即自負卿相抗志凌霄及躡輒呵天詈地咎造物者之不仁及之暗室屋漏所虧固以多矣公恂恂恬穆不尤不怨不以行細不矜不以善小不爲天之所祚雖不於其身猶能於其子孫孰謂天道無知邪詩云不兢不綵不剛不柔布政優優百祿是遒臨胸公愷悌君子也所爲光昭令德以耀關中者固駸駸乎方升之日矣噫嘻公可不死矣公諱俊臣字用章號明渠舉丈夫子五長言後軍都府教讀娶張氏繼娶傅氏次心娶陰氏次治秦娶牛氏次雲龍即余同舉進士聘李氏娶趙氏女四俱適名族孫男三長希閔次問政次問卿孫女九重孫三長之佐次之屏次之翰知

縣西南三十里許有邢村邢氏祖塋在焉此即邑乘所誌元魏太尉邢公之墓也公諱巒字洪賓河間鄆人即今直隸任邱縣僑居襄垣爲邢氏始遷之祖傳稱宗族篤義讓富才藻有識悟多惠政宏詞獨步爲文士之冠芳炳史冊不勝枚舉宜其子孫衆多英才輩出官太守者七十二人載於塋碑及舊誌可徵也考之通鑑元魏正始元年 洪賓公因旱奏請有重粟帛輕金玉鑿奢崇儉等語魏主納之迄今已一千四百餘年矣戶族散遷拜掃由疏以致樵者往焉牧者往焉甚至侵塋爲田用土成壑相傳塋域一頃二十畝今所存者僅四十餘畝而太守碑於焉以失其殘缺廢弛有如此者及 珠 入泮捷往謁塋墓目睹實蹟難禁潏汴每欲重修苦無同志幸族中有廷輔者供職燕京因事旋里聞 珠 之言不勝哀感遂於民國元年春會同萬濤永烈永瑞等親歷刑村挽回塋地十二畝又經國倉等六家共施田地八畝餘以補西邊參差南邊巨壑惟東北兩邊遺趾似在東西闊六十步南北長一百九十二步全塋面積六十廣畝雖與傳言未符而較諸恒塋已過十倍繼又因天寬等十人聞風向善慨然有感共施囊金九十餘千爰以立碑建廬用昭報本追遠之義舉忠良等監修未月而竣既竣囑 珠 記之 珠 愧不文而義不容辭謹述顛末用垂不朽並以告夫後之繼之者

王君寶揚之墓表

孫洪伊

古者積家以成國本一族最親相敬相愛後地闢而民稍繁猶有家人之誼民謂官爲其父母有土地之責者亦咸能各子其民自霸王力爭經營天下用威勢捶笞讐服萬衆制定一尊豎儒制禮媚之使知天

子之貴寵其族人號爲天潢雖婦孺童駿畿甸之間輦轂之下跲藉踏躡民衆以恣志快意如豺虎之於犧牲一日坐堂皇膺民社魁柄在手兼能自專所用吏例不讀書者務希意旨爲事民益無所逃命生死懸於其喜怒痛至腐心徹骨嗚呼物不可以終否茹苦積憤至於清季辛亥之際國之元夫偉人嫉帝制之暴恣也惡官權之跋扈也哀民生之憔悴也揭櫫民權民治大義以與苛制惡魔戰倡率者一二響應者四萬萬百日之間遂鼎新而革故焉君其可以稍慰也耶君 諱 生銀 字 寶揚姓王氏山西襄垣人性剛直識大義自守苦儉以商饒其家親於族仁於鄉一鄉奉爲長老歲丁未景塋以滿之望族爲令於其邑藉捐案喉家丁索苞篚君不從令怒甚拘之淹數月且將加暴焉君迫遣子控之撫藩批飭究會令先調省奉狀益怒不可遏氣虎虎執革鞭亂擊君而君氣亦逾壯厲聲曰官殺人果可不償命耶景懼止擊君獲負傷退歸旬日卒於家時九月十九日也年六旬繼任者卒僅罪差役結案嗚呼冤已娶李氏子二長宇鴻次維新卽所遣上控者今爲衆議院議員有君之風若撫育從弟及姪使成立待族人悉恩禮辦鄉公益道路橋梁社團學校種種不悉書書其大者抑鬱而莫伸者以慰君之靈且銘之曰 勢因積壓而來理爲平等而設沉霾毒霧不掃滅勢旣相迫理莫說不畏疆禦摧武力勒之貞珉諗來者

王公寶揚與德配夫人合葬墓誌銘

苗雨潤

公諱生銀字寶揚世居襄垣縣之東北陽村其先世遠祖諱琮於元時由潞州遷居於此遂瓜瓞綿延成望族焉公生而穎悟六歲讀書成誦因少失怙家貧改營商業然持取素謹億亦輒中閱數年家稍裕復

以餘暇涉獵詩書凡於聖經賢傳有益身心之處無不心領神會期諸實行如有疑問恆就正於鄉中耆宿其好學也如此事親孝每歸必購鮮品以獻遇疾病親事湯藥罔敢或離歲己亥顯妣郝太夫人逝世公哭之哀守柩數載而後葬奉母命也叔父守堂公早逝遺孤生財撫養成人旋遭胞弟生鈺喪悲傷至耳聾遺姪宇泰宇清視猶己子孝友之聲溢於閭里且教子有方督課綦嚴子姪輩無敢荒嬉者咸能卓然自立急人之難無間親疏凡公共事業尤樂於提倡清光緒間村南有水濠介孔道僅架木梁行人多稱不便公毅然倡捐鉅資起石橋村北有水溝數路水皆匯歸焉人憂其刷土以壞路亦倡捐作石坡以送水人皆德之惟嫉惡如仇不畏強禦有以非禮干者面斥之然鄉人遇有爭執咸欲得片言以爲判其正直可知歲丁未景埜以滿籍賁緣握縣篆藉捐案嗾家役索苞篚公忤其旨拘之淹數月且將加暴不獲已遣次子維新控諸省撫藩批飭究會令先調省疑涉控案益怒及公擊以鞭公雖在淫威下侃侃爭辯不稍屈景恐因傷而致意外也遂強送之歸僅數日卒於家繼任者僅罪差役未澈究是非雖大白於世然亦冤己此即孟子所謂威武不能屈者也 德配夫人同邑處士李公女賦性賢淑事親至孝于歸後操家政克勤且儉凡事悉稱姑旨於妯娌行輩間尤能相處和睦性嗜佛老年崇信益篤迨民國肇造政爭屢起次子維新充衆議院議員常以負責救國爲勗其識解遠大若非巾幗中所能道者歲壬戌七月竟以疾卒寶揚公卒於清光緒三十三年九月十九日酉時距生於道光二十八年七月十日吉時享壽六旬夫人卒于民國十一年夏曆七月初八日亥時距生于道光二十六年十一月二十三日吉時享

壽七旬有七今卜于民國十二年夏曆二月二十一日合葬于村東華巖溝舊塋己山亥向子二長宇鴻先夫人二年卒次維新山西大學畢業留學日本明治大學衆議院議員大總統府顧問女四長適南返頭村李來富次適南里信村王煥三適王橋村王紹業四適南返頭村李海水余與維新君係總角交渠充衆議院議員余備席參議院西南護法之役五易寒暑相處一室故于公之德行暨德配夫人事蹟知之甚確謹爲之銘曰 瞻彼太行高山可仰儀型崇宏矜式梓鄉猗歟休哉坤德彌彰教妣孟母言重季姜其見之遠其旨之長宜子孝兮孫賢以永昭乎幽光

清例封文林郎邑庠武生子俊連公墓誌銘

崔廷獻

公諱步英字子俊昆仲二人青錢公居長公其次也世居襄垣少英敏有大志喜讀書日記數千言師每奇之念父升階公母武氏春秋高無力任家政遂輟學遊岳陽府城鎮經營商業居積候時每操勝算獲厚利經濟日見發展蓋襲升階公舊業而擴充之也公又嫻武術精騎射壯歲入武庠欲効用當時世際承平志未果然對社會排難解紛好善樂施多所補益清光緒初晉大侵餓莩相望公惻然糴米西府分給孤寡全活甚衆時令嗣篤敬年四歲夫人韓氏外怵天災內勞家務一病遂不起繼配慶雲張公之女明順仁慈撫篤敬如己出公欣然無內顧憂遂立家塾延名師以課讀寒家子藉得附學猶時以勤苦讀書勉學好人數語作庭訓篤敬亦力學不倦以承父志卒遊洋宮食廩餼領鄉薦留學東瀛造成有用之材皆公義方之教有以使之然也當庚子拳匪肇亂上黨一隅靡若從風公知其爲妖不久必敗力禁村

中子弟勿效尤以貽後患終驗其言壬寅歲修葺村北古佛廟公捐貲督工備極辛苦卒觀厥成說者謂連氏之博科名慶蠡斯皆公功德所致乃天不憖遺公于光緒三十四年二月十七日壽終六十有七夫人張氏持家政十稔之久心力交瘁于民國七年四月十一日辭世其子篤敬因與予列席省議會囑誌墓石故略叙其梗概云爾爰爲之銘曰 秉性明達兮料事如神棄文就武兮壯志未伸燕山教子兮白圭治生扶危濟急兮求仁得仁用垂不朽兮勒諸貞珉

金石考

金石考者考歷代鐘鼎碑碣上之文字藉以覘文明進化之程序歷朝制作之異同爲後人示機緘者也夫爲道爲器皆易於因而難於創東西各強國教育博物館中滿布古物使人游覽金石其最著者意不外此吾中華爲四千年文明古國在世界爲第一蓋盛衰相間固不免有時而窮然窮極則變古聖賢費無量精神造無量文明滄桑毀滅之餘予吾人以寶貴之金石以資研求發揮光大責在後人通久之運此其時矣

大周故飛騎尉連府君墓誌銘

并序

君諱簡字隆潞州襄垣人也原夫后稷發於台原魯郡開于連族周文王之寶裔魯元子之肩緒詳諸史册可略而言矣祖願齊任并州太原縣令韋絃 聲雄沉鳳之津言刃雙揮化偃鬪鷄之路父公隨任汴州博士遷洛州參軍事以詞瀾而孤引挹函丈之清規業奧三冬運高十上入季長之帳篋筭同收窺夫子之牆室家咸覩惟君良弓嗣美隆凍馳芳下丹 以摛文洞驪泉而篤耀旁遊四術貫三矢而揚葩不事雕蟲自有壯夫之節屬三韓舊壤九種遺黎恃烏菟以稽誅控滄波而作梗君以六郡良家首膺召募百夫勇進戰鬪先鳴蒙稱飛騎曲隨班例也於是心高一指體木雁於生涯三樂當頭達勞休於彼分白雲 幾留翫於青谿黃肆陳 於窀穸永昌元年八月二十日寢疾終于家館春秋六十有六夫

襄垣縣志

卷之七 金石考

二十六

人張氏南陽西嶧人也稟訓閨儀承規閭則嗣紅姝而挺質資洛媛以凝神舉案之禮聿修鼓盆之化俄及延壽元年八月七日卒于私室粵以天册萬歲二年歲次景申一月甲辰朔八日己酉合葬于襄垣縣西一十五里純孝鄉之第平原禮也嗣子哀經陟岵痛切蓼莪恐寒來之暑往陵谷之變遷勒哲人之勝躅庶不泯於千年迺爲詞曰

后稷之苗文王帝子德一隆基通三命氏魯郡浮禎連休薦祉冠冕相望簪裾曳履 其一 惟君傑生立志

縱橫神雄召募戰鬪先鳴琴君賞逸風月陶情未終三樂儀奠兩楹 其二 旒飄浮悲歌慘切素車徐輪靈

輻儼轍參隴比 兩河西絕松 風烟霜 湛月 其三 質凝懋德 靈岫乘雲仙 貫霧分姿

禮節 媛猗歟玉嬪照晰 其四 有月忽頹箭川 急蘭室罷生蒿里逝集春鳥朝啼秋霜夜泣歎茲

憤樹悲風 其五

黃魯直薄酒醜婦歌石刻

薄酒可與忘憂醜婦可與白頭徐行不必駟馬稱身不必狐裘無禍不必要福甘飡不必食肉富貴於我如浮雲小者譴訶大戮辱一身畏首復畏尾門多賓客飽童僕美物必甚惡厚味生五兵匹夫懷璧死百鬼瞰高明醜婦千秋萬載同室萬金良藥不如無疾薄酒一談一笑勝茶萬里封侯不如還家薄酒終勝飲茶醜婦不是無家醇醪養牛等刀鋸深山大澤生龍蛇秦時東陵千戶食何如青門五色瓜傳呼鼓吹引部曲何如春雨一池蛙性剛太傅促和藥何如羊裘釣烟沙綺席象牀雕玉枕重門夜鼓不

停拋何如一身無四壁滿船明月臥蘆花吾聞食人之肉可隨以鞭扑之戮乘人之車可加以鈇鉞之誅
不如薄酒醉眠牛背上醜婦自能搔背痒

黃魯直石刻薄酒醜婦二歌相傳舊存涼樓上即八景勝景中涼樓觀年久樓傾此石亦墮於河後有人渡河見一處

水勢潏洄澈底澄清甚以爲異披沙求之乃得是物不知何時轉落邑中姓姚家存或云即其先人從河中撈出未識是否珍藏

既久遂據爲己有至咸豐年間姚氏式微意欲轉售書院首士以錢二十千購之永藏漳川書院爲邑中公物或有願搨印者咸到書院斷勿許外人私自取出附記於此以告將來

碑碣

大觀聖作之碑 宋徽宗頒現存文廟

黃魯直二歌石刻

雙兔碑 爾朱榮射中雙兔處

義令碑 郝村道隘有義令立石上書輕避重少避老賤避貴來避去

雙榆社碑 在縣立義坊

四榮碑 爲劉文安公立

天龍寺碑 寺建於齊武平年間隋開皇十一年重修因立此碑宋改寺爲壽聖寺今改爲農林試驗場內有佛像三座尙存

襄垣縣志

卷之七 金石考

二十七

虜亭弔古石刻 明萬歷時南皮槐亭李騰鵬書筆峯秀利碑存虜亭城隍廟內詩云山色周圍斷復連

漳河東下勢潺湲故宮凋落迷衰草廢縣荒涼鎖暮烟輪奐奔馳何日盡妖形變幻至今傳蛾眉自古

能傾國浪說崔生抱虎眠

周故韓州助教向君墓誌銘 民國五年七月二十九日出土銘存向村學校

君諱徹字皎然上黨襄垣人也原夫上相歸周順天心而受國右師戰魯分地理而酌勳其後君子推賢

集山陽之龍鳳大夫貴德錫河內之膏腴珠浦重輝瓊林疊秀祖 康隨任雍州錄事參軍境控龜津地

當鶉野肅霜威而莅郡氣逸烏台皎冰壺而勳職風生白簡父 舉唐先從募團校尉遷德州留守功超

百勝崇策而寧西都勇冠三軍杖謨而靖東邑勅封上騎都尉君少挺英奇琴書是友幼通博學仁義爲

藩年纔弱冠任韓州助教典青襟之禮樂立行可模貫玄鳥之精華出言成範不謂神徵異數先收管輅

之年鬼瞰明靈不與顏回之壽春秋二十有八即以貞觀十九年四月一日遘病終於私第夫人韓氏娥

輝降祉婺宿垂精出峽僊雲雖發陽台之藻驚林逸頌遠銷陰魄之形封植龍門而悲一死光飛寶匣竟

欲雙沉春秋八十有一久視元年二月十六日終於私第嗣子崇仁等咸得曾參故跡越禮外而居喪姬

旦遺塵孝經中而用事長安三年歲次癸卯二月癸巳朔二十八日庚申會葬於村西北二里平原禮也

東西水陸魚鳥徘徊南北荒阡風煙爛漫石銘山上咸推杜預之機玉掩泉中幾惜文康之見嗚呼哀哉

乃爲銘曰流源九曲崇基萬仞河朔藩周山陽遁晉克嗣明德代貽忠信隱顯殊途徽猷並振 其一 輪環

氣序奄忽年齡沂州歛曲岱岳知名草無春色松有秋聲悠然荒隴若對佳城 其一

唐故驍騎尉韓公墓誌銘 并序

君諱昂字孝昂上黨襄垣人也自周后乘時構興王於大業晉卿出聘披總簡於幽圖安國飛華譽高梁苑伯休晦景響振秦邦功凝首出之先德被生靈之右昭絢圖史可以略言祖嵩韜光不仕陶樽泛菊疏逸相於折腰許樹懸瓢張高情於洗耳父年隋隴州泮源縣鄉長良弓嗣美隆棟馳芳下丹穴以野文洞驪泉而寫耀貞非遜俗隱異遠親晦明略於危邦體安排於陋巷君稽山擢幹渥水丰姿無煩括羽之榮自表摧奇之質旁遊四術業奧解頤遠迹六戎猛逾通臂遽而隋綱不振大寶將遷傾晉祚於昌明掃秦業於胡亥君鑒董扶之說感殷馘之言效南陽之伏符察東井之祥緯俄從豹變歎欵轅門授驍騎尉隋班例也既而天地交泰日月貞明靡薰風於舜絃忘帝力於堯壤湛幽情於蠹簡思洽五門矜雅操於穿床契通三古山陽擁竈無虧繕性之方漢滋驍畦自得忘機之樂清哇度曲響韻韓娥綠綺浮音調諧師父坐客恆滿彥昇之迹可尋罇酒不空文學之情斯泰亭亭秀氣遠出煙霞肅肅清風近流松柏洵爲人倫準的月旦雌黃者焉悲夫三樂當歌始慰循陔之慕九原馳思俄聞陟阼之悲以上元二年九月九日終於家春秋七十有九即其年十一月辛丑朔二十日庚申塋於襄垣縣西南三十里之原禮也嗣子楚元等哀纏風樹痛結寒泉悲舟壑之遽改憚桑海之遞遷刊哲人之勝躅播芳猷於永年 其一 其詞曰 偉哉慶緒系彼周王伯休承裕安國聯芳功綿九野響動八荒粵鍾明哲家聲載陽 其二 猗歟克構材雄杞

襄垣縣志

卷之七 金石考

二十八

梓展効轅門棲情學市道光瑤壁德充桃李不吊昊天遽殲蘭芷 其三 先遠既符稱家斯設哀歌動聽靈

輒儼轍漠漠宵煙蒼蒼曉月天長地久芳華無歇

讀唐驍騎尉韓公墓誌

李其昌

嗟呼賢哲顯晦之遭誠令人不可測也如韓公者當大唐之初葉爲開國之元勳自爾至今曆千數百年之久而其間之治亂頻經遺踪已邈滄桑多故信史不傳雖其顯然於當時竟致晦然於後世良可慨已特是勝蹟留貽千秋如昨奇功卓著百代猶新突於宣統二年春在韓家坪道旁得墓誌銘一方摹而讀之莫不嘆吾襄之大有人矣奈愴夫貪財貨其原刻幸有韓子名嘉樂者前印原文尙存不忍前賢往哲湮沒不傳集貲重刊囑予爲記因略序數語錄其原文於左嗟呼韓公遠矣誰復能知之哉讀斯文而聲威昭著不啻身履唐廷一爲親炙其丰采是公之由晦而顯也若有數存焉則斯文之發見信非偶然

大唐處士張君之墓誌

君諱君備南陽白水人也其先張羅之後聳千築之茂櫛引萬頃之洪原本盛以之分鑣根隆於焉離派遂得金枝流於襄部玉葉散於韓都曾祖買齊任幽州錄事祖隨任韓州錄事父隨任朝散大夫並鷹陽河朔獨步漢南德冠吳門道高孔室判書定禮詎待過庭洞易閑詩豈勞洙泗加乃開東閣關西園同鄭庄之好賢類田文之待客自可保茲遐性福此族延豈其邁疾彌留幾於大漸痛百年之長往愍一旦之

遯逝夫人王氏百行無虧三星令淑風燭難停俄隨電沒爰於嗣聖元年歲次甲申二月癸丑朔二十一日壬申合葬於城西北三里之平原禮也嗚呼哀哉乃爲銘曰百年長往一旦遯征茲晨永別空留

唐故清河張府君墓誌 并序

處士曾諱儉祖諱壁瑩域銘記城北三里原也君諱俊幼而早孤不沐庭訓立身之道皆自琢磨於鄉黨而似不能言與有交而必敦其信或林間暢酒或濠上觀魚均語默於出處之徒齊物我于是非之境豈爲楹間起夢斜日成災寢在日致俄悲逝水降齡七十有一終於招書坊之第夫人連氏挺氣嚴凝天姿淑慎和鳴發宜家之詠芳聲著琴瑟之調倚仗難明俄傾薤露春秋五十有四卒於室嗣子承思仲子善祐季子進朝等不墜先風增修孝悌生盡其養難忍鞠育之恩歿致其哀何拮劬勞之報於建中四年歲次癸亥十一月甲戌朔二十九日壬寅安措于城西北二里之平原禮也於呼高岸爲谷深谷爲陵彫盛誌于斯文播佳聲於不朽銘曰徽默肅肅容止堂堂允矣君子德音孔臧有要有倫多才多藝如何彼蒼降此大戾春秋遞謝日往月來變寒揪之慘慘弔霜露之衣衣

元故奉訓大夫饒州路總管府判官致仕秦君墓碑銘

王 綽

君諱佐字輔清姓秦氏世爲上黨壺關人金季兵亂家譜散逸高曾而上無從稽考大父諱彬遷於襄垣愛其風土遂家焉父諱璽字國寶幼失所怙稍長克自樹立篤志於學以儒緣飾吏事習國朝誥甚熟輕財樂施鄉里匱乏者多周恤之非其義一介不取時兵後邑旁多墮土則已業也對曰他人之田奄而有

之義乎言者嘆服仕至襄垣主簿卒年三十五妣王氏子男二人長卽君次日偉君幼器不凡天性孝友與弟偉事母承順無違兄弟怡怡如也及母卒哀毀踰禮鄉人稱之至元十五年江西憲司察君之行辟爲椽未幾爲福建元帥知事先是土豪陳吊眼卒衆來附旣而殺同僚據江州叛帥府往捕選君冒烟瘴搆賊巢尤攻討招納軍務叢劇君處劃明敏悉中事機賊獲有欲盡誅其黨類者君爲白于主帥曰奉命討賊渠魁旣已就戮脅從之徒理宜寬貸若玉石俱焚慮有挂誤主帥納其言由是全活者衆以平賊之功上之樞府例加優渥三十三年爲東京等路中書省椽未幾改福建等處行中書省椽元貞始元受從仕郎荆湖北道憲尉司都事遷吉州路總管陞承事郎浙東尉司都元帥府都事君累佐大藩游刃有餘上官倚以爲重所歷見稱年老歸鄉梓游優晚節朝廷以奉訓大夫饒州路總管府判官致仕延祐七年六月二十四日以疾卒于襄垣私第之正寢享壽七旬有三夫人同郡王氏淑德懿範族黨稱賢前君六年卒追封襄垣縣君至是祔焉葬于城西北五里許先塋之次子男二人長曰思恭以君廕武岡縣稅務大使調平江州縣尉次曰思敬仕中政院譯史廣通倉大使除猗氏縣君未赴選光中書右史譯史丁饒州君服闋除南陽府同知汝州事俱能世其家女三人適崔氏楊氏韓氏諸名儒君弟偉字伯容子男二人長曰彰信陝州路江陵路總管府屬次曰思孝應州儒學正汀州上杭縣金豐鄉巡檢女二人亦嫁名族思恭等狀其行事赴京師乞銘曰先人棄諸孤有年矣顧瞻松楸旌紀寂寥恐無聞于後思恭惟是懼幸執事諸父以垂示永久存歿與有榮焉予嘉晉之風土完厚故其人質直而尚義疎財而用儉好謀而

能慮君平昔在官以廉能著居家以孝謹聞又有賢子孫以大其門君可謂無憾矣銘其可乎銘曰 嗚呼秦君惟廉惟仁其行坦坦其政循循 其一 嘉言孔碩憲司載辟帥閩聞名義舉實職 其二 婉畫是資秉心公勤縱獲餘寇幾活千人 其四 五擢省書三選旅府凡所軍出美績攸著 其五 成功身遂考終天年有子若孫垂裕綿綿 其六 襄垣之原松柏是茂松柏可祐君名不朽

九連山三聖庵映光禪師昇化圓寂建塔碑記

李雍朝

禪師法諱清碧道號映光本邑立教里人鄰其姓也祖居襄城西關幼秉清穆之性不樂與塵囂近輒矢志修行第少時以父母縻繫不樂決絕暨親沒遂慨然曰今而後吾其永謝塵世偕彼松子遊矣托迹浮屠六根之嗜好胥捐寄名袈裟三昧之眞火必透悟時望十地三乘凝滯了四生六道曹溪路險發願梯抗程西域鷲嶺雲深雅懷虛寂揮部洲磨磚作鏡積雪爲糧迷途却是醒路懺禮梁皇經誦彌陀脫俗自見天機迨其立志久功修長果也返樸歸眞迥殊和光之輝俗明心見性堪接證果之朝元於甲申小春節跌坐而逝宛然西歸冥化無聲天地之元神猶聚完形不朽般若之妙境突昇四境之人仰其德行知其眞積有素應超凡塵已久矣至今遂莫不欣然拜祝喜其功德之有成也望其容猶生前焉窺其神若天授焉夫乃嘆不生不滅玄虛自有眞境耳大衆咸悅恐其沉淪湮沒無以奠不朽之靈光以傳來許也因議建塔以表之迨給善疏頭而人遂莫不樂從焉洎乎乙酉初夏擇日修建而四方善信喜捨樂施者乃遂接踵而至爭先恐後也未至彌月而此塔聿成此雖人心之好善乎亦禪師之所鼓舞者實大耳是

